

173
KANTIK

EVIT CHAPEL NEVEZ

ITRON VARIA LAMBADER
E PLOUVORN.

*Benniguet gant an Aotrou'n Escop d'an
9 a viz guengolo 1877.*

DISKAN :

Saludomp oll mam hor Zalver
E chapel nevez Lambader,
Hag ar Verc'hez hon diouallo
Breman hag en heur hor maro.

1.

Peguen dous eo d'am daoulagat
Guelet savet ti hor mam vad,
Guelet Lambader paour ha noas
Hirio kaeroc'h evit biskoas.

2

Evel eur brinses eo guisket
Gant he zae mein dentelezet ;
An heol var douar Breiz-Izel
Ne velo ket ker brao chapel.

3

Ar pillerou nerzus ha teo
A zo henvel ouz guez dero ;
Dindan ar beac'h ne blegint ket,
Chom a rei sounn ho fenn kalet.

4

Ma koustas deomp, ha koustet eo,
Bezomp laouen evelato :
Rei dar Verc'hez, rei da Zoue
A dal ouспен prena leve.

5

Lochennik soul ha ti balan
Ne vezont ket savet eb poan,
Mogeriou mein, toennou glaz
A zo gantho poan vrasoc'h c'hoas.

6

Ar hoan avad, evel ar pell,
Abred a nij gant an avel ;
An ti a jom, d'he vestr e ro
Disheol en anv, er goanv disklaou.

7

Aman ivez disglao, disheol
E skeud Mari zo 'vit an oll,
Aman kouls hag er feunteun ven
Eo kre an dour enn eienen.

8

Evit hag evit, tud fidel,
Dour beo ar vuez eternal ;
Evit dour ar grasou nerzus
A red euz kalon mam Jesus.

9

Guechall branellou, chadennou
A velet ouz ar mogeriou :
Aman c'hoas e vezo kavet
Al liberte hag ar iec'hel.

10

Ia pec'her paour, ia pec'heres,
Mar pedit gant feiz ar Verc'hez,
Ne viot mui sklavourien Satan
Ho chadennas da gass d'an tan.

11

Bennos deoc'h, Plouvornis, bennos
Da veza bet treac'h d'ho tud koz,
N'ho meulin ket, rag ho chapel
E deuz mouez, mouez huel.

12

Ho tour ivez, eur vech savet,
Vezo burzudus da velet ;
Tour all ebet, nemet Kreisker
Ne vo par da dour Lambader.

13

An durzunel, ar guennili
O deuz eun neiz d'ho goudari ;
O Lambader, c'hui vo bepret
Va neizik-me, va neiz karet !

14

Da zeiz ankenius ar maro,
Gant fizians vras me lavaro :
Digorit din, aoutrou Sant Per,
Mab ounn da Verc'hez Lambader.

Imprimatur : *Quimper, 24 Août 1877.* *M. Guillou*

DU MARHALLACH, Vic. gén.